

## Gespräch mit Fr. Leonhard Fellner, Bergarbeiter i.R., geb. 1914

Wirtschaftl. Lage vor 1938:

Drei Jahr hab i bei an Bauern garbet, ohne daß i an Schilling kriagt hätt. Dann bin i aufd Saoug, zan Hartl ganga, da hab i wenigstens oan Schilling im Tag kriagt, de Feiertag hat er unsaber a azochn van Loh. Am Sunntag bin i in Wald aufi ganga und hab Kranawent-Bee brokt und habs trocknt und an Apotheke Ablinger in Saefen vakaft.

Krisenheim: Rosental Nr. 37

De Arbeitslosen sand bei de Gasthäuser, beim Wachter- und Metzgerwirscht nit gern gsechn gwesen, weil's nix konsumiert hamb, se nur gwarmt hamb. Se hamb glei 40 Groschen Unterstützung imTag kriagt, des is a Halbe Bier gwesen. Und da hat da Metzgerwirt den Arbeitslosen in an Jungwald in Ullach drin a Holz gschenkt zan selber arbeiten. Des hama ocha tragn und in der Mittn längs mit der Handsag ausananda gschnittn. Dann ham ma's Krisenheim baun anfanga mit zwoa arbeitslose Zimmerer. Aber bald sand de Schantenga kemma und hamb gsagt, daß a Schwarzbau is, aber da Burgermoaster hats ins dalabt ghabt. Es hat nix gnutzt, mit aufpflanzten Baionett hat's da Schantenga aufn Posten umi triebn, des sich i heit no, wias achi sand durchs Rosental, de Arbeitslosen voraus und hintbei da Schantenga mitn Gwehr. Da hat se da Buagamoasta wieda einschalt und es is toleriert wordn, daß in da Nacht a bißl weida baut hamb, untern Tag is neamb da gwesen. Uns so is fertig wordn, s'Krisenheim, a Dach hats a no kriagt und drin hamb ma a ghobelte Taferung ghabt, de gibt's heit no.

De Polizei is dann öfters da gwesen und hier und da hat sie scho a a Frau in da Nacht eini verirrt, hat eh aufn Tisch obn schlafn miaßn.

Hammerschmied Sepp:

Da Sepp hat se im Danielstollen drin versteckt, zwoa Winter lang,. Er is beim Kriag gflücht va da Rußland-Front. Neamb hat mehr was gwußt va eam, nur da Schmutzer Oerg hatn mit an Wild a wenig gepflegt, des is a Jaga gwen. Im Danielstollen; hübsch tiaf untn is so Loch gwen und da hat er a Foierung ghabt und da hat da Sepp kocht. er is nia varaten wordn. Und jede dritte Nacht is der Hadalump ausgschlichn, hat koa Spur gmacht, a an Winta nit, nix is aufkimma. De Eubacher Loisi, a Sennin, - i woäß nit, hat ers amal als Jungfrau braucht ghabt- de hat eam a ghoifn, se hat eam im Stall ehta a Flaschn MÜch agmoichen. Aufhängt hat er se no vor Kriagsende, wei er so an Ausschlag kriagt hat aufn Kopf, an grauseng, va da Feicht im Bergwerk drin, grad a so achitrefetst is. Zan Dokta hat er se nit hitraut, da Talman is zwar nazifeindlech gwein, a Schwaschza is er gwen, woäßt scho, wens ba dernan nit gwesen bist, bist a koana gwein in dera Zeit. Da Sepp is a eigfleischtta Roda gwen. Er hat a no gheiret doscht, da Sepp, a Fiababrunneren, de hat va an ondan a Kind ghabt.